


7 no: 17
C O P P I E

DES MEMOIRES SE-
CRETS EN FORME DE
Missiue, Enuoyez de Bloys par vn
Polytique mal-asséuré à vn sien amy
aussi Polytique de ceste ville de paris.

*Avec la responce laquelle a esté descouuerte
sur vn Lacquais sortant de ceste Ville,
lequel a donné l'adresse dudit Polytique,
au logis duquel lesdicts Memoires ont
esté trouuez.*

Contenant sommairement & au vray l'estat auquel
presentement sont les affaires du Roy &
de l'vnion Catholique & Generalle
de France,



M. D. LXXXIX.

G O P I E

DES MEMOIRS

DE LA SOCIÉTÉ

ROYALE DES SCIENCES

DE PARIS

ANCIENNE

ET NOUVELLE

ACADEMIE

DES SCIENCES

DE PARIS

ANCIENNE

ET NOUVELLE

ACADEMIE

DES SCIENCES

DE PARIS

ANCIENNE

ET NOUVELLE

ACADEMIE

DES SCIENCES


DE PARIS

ANCIENNE

ET NOUVELLE

ACADEMIE

DES SCIENCES



COPPIE DES MEMOIRES

*secrets, en forme de Missive, enuoyez de
Blois par un Polytique mal-asséuré à
un sien amy aussi Polytique de ceste
ville de Paris.*

Avec la responce laquelle a esté descouuerte sur vn Laquais
sortant de ceste ville, lequel a donné l'adresse dudit
Polytique au logis duquel lesdicts
Memoires ont esté tronuez.

Contenant sommairement & au vray l'estat auquel
presentement sont les affaires du Roy & de l'v-
nion Catholique & generale de France.

Monsieur, ie ne vous veux
point remettre au deuant
les bons fondemens & pi-
lotis sur lesquels nostre re-
ciproque & mutuelle amitié est de long
temps bastie: car par la mention que
i'en ferois, il sembleroit aussi que ie fis-
se quelque doute d'icelle: Mais ie vous

A ij

veux coniuurer par là, de me fauoriser
 de tant que de me vouloir par la pre-
 miere asseuree commodité certiorer
 de l'estat des affaires de par delà: com-
 ment elles sont disposees, comment ai-
 gries, comment adoucies, Brief quelle
 opinion vous en auez: En vous suppliāt
 aussi de me dōner sur le tout vostre bō
 aduis: afin que suiuant iceluy ie me re-
 solue ou à bis ou à blanc, à suyure l'vn
 ou l'autre party le plus asseuré & fauo-
 rable. Et pour ne vous laisser matiere
 ny occasion de m'esconduire en vne si
 iuste priere, le me suis le premier mis en
 mō deuoir de vous représenter au vray
 le cours des affaires de par deçā: afin que
 ensemblemēt s'il vous plaist nous puis-
 sions nous resoudre en quelque sorte
 pour cōseruer, & nos vies, & nos moyēs
 & si peu de cōmoditez que Dieu nous
 a dispersez en ce miserable siecle: auquel
 ie voyois les choses si embarassees que

d'oresnauant ie m'y mescoinois totalement.

I.

Je commenceray donques par nostre siege d'Orleans: duquel nous auõs receu nouuelles que les cõpagnies des Sieurs de Montigny & de Fargy y ont esté deffaites par les assiegez: & les mulets de bagage de Monsieur le grand Prieur prins & emmenez dedans la ville. Le fils de Monsieur le Marechal de Matignon, & lesdits Sieurs de Montigny & de Fargys, avec quelques autres Gentilshommes se sont sauuez à la fuite. Je crains fort que ceste desroute sera cause que nostredit siege descâpera biẽ tost, si desia il n'est leuë: attendu que ja au parauant l'on nous auoit asseuré que les forces du Roy s'y fondoient & diminuoient tous les iours à veüe d'œil: mesmemẽt que si ceux de dedans se fussent entrentendus, qu'ils pouuoient d'un seul effort, tailler to⁹ les nostres en pie.

A iij

ces: mais qu'ils n'osoiēt librement faire
 sortie en gros: parce qu'ils n'estoient
 pas asseurez du retour & de la rentree,
 pour la meffiance grāde qui estoit par-
 my eux, laquelle targoit d'avantage
 les assiegeans que leurs propres forces.
 Nous scauons biē que le Roy a des bōs
 feruiteurs dedans la ville: mais ils sont
 en beaucoup plus petit nombre que ses
 ennemis.

III.

Pour l'esgard de Rouen le Roy re-
 ceut ces iours passez lettres de Mōsieur
 de Carrouge, par lesquelles il mandoit
 que ceux du Haure auoiēt menacé Mes-
 sieurs de Rouēn de ne plus leur laisser
 passer aucunes commoditez ny de vi-
 ures ny autrement: & de leur faire tous
 les desplaisirs dont ils se pourroient ad-
 uiser, s'ils n'embrassoient le party de l'v-
 nion & de la religion Catholique. Ce
 qu'entendu par ceux de Rouen, avec
 l'inclination qu'ils y auoient desia, Ils

protestèrent en deux assemblees generales qu'ils feirent entre eux, de ne recevoir ny admettre dedans leur ville garnisons ny forces aucunes de la part du Roy: disans que la dernière fois que il y fut, il leur apporta tant d'incomodité & au plat pays (sans parler de leurs femmes) qu'ils s'en ressentoient encores. Occasion, disoient-ils, qu'ils ne pouvoient maintenat que le souhaiter aussi loing d'eux que possible il en voudroit estre pres: & mesmement ils firent assavoir à mondit Sieur de Carouge qu'au cas qu'il fust semblant d'entreprendre quelque chose contre eux & leur resolution, qu'il ne s'y trouueroit pas le plus fort. Cela donna occasion audict Sieur de Carouge (comme il y en auoit assez de matiere) de despecher soudain vn courier au Roy pour, sur l'aduertissement de cecy luy demander secours. Ce que le Roy luy accorda & luy enuoya

soudain quelques Suisses : mais si tost
 que ceux de Rouen en furent aduertis,
 quant & quant ils manderent ausdicts
 Suisses, que s'ils se vouloient appro-
 cher d'auantage qu'ils fissent leurs té-
 staments de bonne heure. Ce contre-
 mandement receu par les Suisses (qui
 estoient desia à deux lieues de Rouen)
 eust tant de force sur eux qu'ils ne vou-
 lurent iamais passer outre, pour quel-
 que instance & commandement qu'on
 leur en peust faire.

IIII.

Or depuis cela, Monsieur de Carou-
 ge à tousiours esté veillé de si pres, que
 ie n'estime pas qu'il puisse ny ose d'o-
 resnauant remuer quelque chose. Et ce
 qui luy est & sera le plus contraire, c'est
 l'appuy & le secours que son propre
 fils donne aux habitans dudit Rouen,
 lequel s'est bandé contre son Pere pour
 embrasser la cause & le party desdits ha-
 bitans, violant par là toutes les Loix &
 de

de raison & de nature. IIII.

Quant à ceux de Troye, vous scauez comment depuis la mort de Monsieur de Guyse, ils se sont declarez ouuertement contre le Roy, pour le party des Catholiques: Ce qu'ils n'auoient pas fait du vivant dudit Sieur de Guyse. Enquoy le Roy a esté bien deceu de son expectation: car il en faisoit asseuré estat.

V.

Monsieur de Tinteuille depuis n'auoit enuoyé audit Troye Monsieur de Villemorie pour tascher de les reconuertir au seruice du Roy: Mais si tost qu'ils eurent descouuert ses menees, ils le poursuiuerent si viuement, que sans vn soudain pre-aduertissement qu'il eust par l'un de ses gens (lequel en passant, fortuitement en auoit ouy quelque bruiet) indubitablement il y eust perdu la vie.

VI.

Auant-hier, ou le iour precedent,

vn marchand d'icy receut lettres dudict
Troye, par lesquelles on luy mandoit
d'vn certain officier du Roy, lequel
pour auoir parlé vn peu trop ouuerte-
ment des troubles de ce temps à l'aduā-
tage du Roy, auoit esté massacré par la
commune: Mais de cela nous n'en auōs
certitude que par lesdictes lettres: aus-
quelles ie ne donne point de foy. Il est
bien vray qu'vn artisan y fust tué tout
au commencement de ce remuement,
pour auoir seulement dit, oyant la mort
de Mōsieur de Guyse, qu'il estoit mor-
tel comme vn autre. VII.

Quant à ceux de Poitiers le Roy
a fort tasché de les gagner par promes-
ses & belles offres: Mais on n'en a sceu
tirer autre raison ny responce, sinō que
ils portent tant de respect à la memoire
de deffunct Monsieur de Guyse, duquel
ils tiennent la conseruation de leurs
biens, la protection de leurs vies, & la

manutention de leur ville, qu'ils ne se
rengeront iamais au seruice de celuy
qui la opprimé.

VIII.

Ceux de Dijon n'ont pas mieux fait
que les autres : car aussi tost qu'ils sceu-
rent la mort de Monsieur de Guyse, ils
constituerent prisonniers quelques of-
ficiers du Roy, & mirent garnisons aux
logis d'aucuns Conseillers de leur Par-
lement.

IX.

Ceux d'Angers sont de mesme fa-
rine & aussi peu zelez au seruice du Roy
que les autres : car ils ont tant fait que
ils se voyent auourd'huy les plus forts.
Et combien que l'une & l'autre ville se
soit assez declaree, toutesfois le Roy
n'est pas encores hors d'esperance de les
ramener toutes deux à sa deuotion. Et
à cest effect il y a secrettement enuoyé
quelques personages entendus & fa-
ctieux (que vous cognoissez) pour y pra-
tiquier des hommes & y negotier ce

qu'ils pourront.

X.

Pour l'esgard de la Picardie, excepté Saint Quentin & Boulongne, nous l'auons toute perdue, sans esperance de recouremēt, si ce n'est à belles forces.

XI.

Les Picards ont prins vn passe-droit plus grand que les autres; car ils ont fait publier par tout le pais, defences tres-expresses à tous Seigneurs, Gentils hommes & autres de quelque qualité qu'ils soyent, de monter à cheual, n'y s'armer en quelque facon que ce soit pour le seruice du Roy: ains seulement pour l'vnion generale des Catholiques de la France. Et au cas que quelqu'un ou plusieurs vueillent cōtreuenir, & de fait qu'il contreuient à telles deffēces, ils ont permis aux communes & à toutes personnes de se ruer sur eux, avec pouuoir & liberté de les assommer: & de là d'aller ruiner abbaye & foudroyer leurs maisons, ou cha-

steaux, ce qu'ils ont tous protesté & iuré de faire & garder inuiolablement iusques à la mort. *XII.*

Mais si vous voyez ainsi, le Roy grandement affligé par dehors: croyez qu'il ne l'est guere moins chez luy, tesmoing mesme que plusieurs de ses gardes se desbandent, & s'en vont trouuer les vns Monsieur du Maine, les autres le Cheualier d'Aumalle, & les autres s'en retournent à Paris.

XIII.
Et puis au plus fort de ses affaires, comment pensez vous que la mort de la Royne sa mere luy est venue mal à propos? Certes i'estime qu'il ne se peut assez exprimer. Aussi depuis icelle mort ie le trouue fort chagé & tousiours fort mesfiant, voire de la moitié plus qu'il n'estoit au parauant: car il ne s'assure quasi plus de personne, ce qui nous est vn grandissime malheur, voire le vray

moyen par lequel ses affaires & les nôtres receuront beaucoup de diminution & de retardement, & possible en fin vne ruine certaine & ineuitable.

XIIII.

Mais encor n'y a il chose iusques icy qui ait rendu le Roy si pensif & estonné que la declaration de la Sorbonne, touchant la dispence qu'elle dit & assure que ses subiects ont de l'obeissance que ils luy deuoiēt, & de la fidelité qu'ils luy auoiēt iurée: A laquelle declaratiō, pensant apporter quelque antidote, & la rendre par là infructueuse, il assembla quelque nombre d'Euesques & d'autres Ecclesiastiques, pour leur faire declarer ladite Declaration & resolution nulle, & de nul effect, & du tout incompetente: Mais ils rapporterent tous au Roy qu'il les prioit d'une chose du tout impossible à eux, d'autant que la Sorbonne n'auoit rien decreté que suyuant &

conformément aux Saincts Concils & Decrets, lesquels personne ne sçauroit contredire. XV.

Or voila l'estat d'une partie des affaires de pardeça, lesquels ie vous ay representé sans flatterie & tels qu'ils sont à mon grád regret, mais la verité, la peur qui m'en reuiet, l'obligation dont ie vous suis attenu, & le desir que i'ay que vous en vsiez de mesme en mō endroit, m'y ont necessairement contrainct.

Quant à l'autre partie elle vous apportera vn peu plus de contentement.

XVI.

Premierement la Royne d'Angleterre a offert au Roy secours, & de ses moyens, & de son pouuoir, en le priant de cōtinuer ses pointes, & disant qu'en tous cas elle luy promet tousiours de le releuer d'une mauuaise cheute, mais ie n'en fais pas de cela grand bouclier: car i'estime la consolation bien de so-

l'ee laquelle ne propose qu'un remede
au mal. XVII.

Quant aux forces du Roy de Nauarre, nous en sommes tres-assurez : car outre qu'il l'auoit desia promis, il enuoya encor ces iours passez vers le Roy Monsieur, de Roquelaure, tât pour l'asseurer de son seruice, qu'aussi pour les Tresues que le Roy & luy ont accordees respectiurement par ensemble.

XVIII.

Ledit Sieur de Roquelaure n'estoit pas seulement enuoyé pour ceste assurance & tresues : mais pour plusieurs autres chefs, lesquels nous ne scauons encor ny quels il fût, ny quelle resolution le Roy luy en a donné, d'autât q le Roy s'y tient le plus couuert qu'il peut. Mais il me semble qu'il seroit plus expedient pour luy qu'on s'apperceust de ce qu'il negotie avec ledit Roy de Nauarre, que de sa ruine & de la nostre : car les dissi-
mula-

mulations qu'il y veut apporter (pour passer outre a des choses qui seront de plus mal-aisee digestion à nos ennemis que lesdites trefues) le rendent plus tardif au bout hors de ses cōceptions, & desseins, & ce pendant nos affaires s'acculent, & demeurent là. Nos ennemis ne perdent point de temps, & nous le prodiguons esciemment.

XX.

L'on parle icy que le roy veut faire declarer sō successeur à la courōne Monsieur le grand Prieur de France, mais ie ne vous en puis rien asseurer, sinon que il en est grand bruiet: neantmoins ie le croy mal-aisement: Car par ce moyen le Roy necessiteroit ses affaires & son Roiaume à vne combustion tres-grande, d'autant qu'indubitablement ceste declaration seruiroit d'allumette à la maison de Bourbon pour faire la guerre au Roy, & ainsi il se creeroit tous-

iours d'avantage d'ennemis, dont il a desia sans cela, assez copieux nombre.

XX.

Monsieur de Montpensier & Monsieur le Prince son Fils sont en chemin pour venir trouver le Roy, Ils sont suivis de beaucoup de Gentilshômes, lesquels pour la plus part venoient icy, estimans que la mort de Monsieur de Guyse eust terminé la guerre, mais ils se verront trompez de tout le Ciel.

XXI.

Quant à Niort ie ne vous en mande rien, parce que vous sçavez comme le tout s'y est passé, & que Monsieur de Malicorne y a laissé entrer les gens du Roy de Navarre sans coup ferir.

XXII.

Quant à Chaalons en Champagne, vous sçavez aussi (comme i'estime) qu'il est à la deuotion du Roy, & que Monsieur de Tinteuille est dedans qui y

commande. Toutesfois il est encor à craindre que ceux du dedans ne veuillent tenir deux cordes en leur arc (comme l'on dit) & se reseruer tousiours la puissance de se pouuoir réger du costé de l'un ou l'autre party, lequel ils verront avec le temps estre le plus fort.

L'occasion que i'ay de ceste mesfiance, c'est qu'ils ne veulent pas permettre que Monsieur de Tinteuille s'y rende le plus fort, dont le Roy a bon aduertissement. Occasion qu'il a commandé audit Sieur de Tinteuille par deux despèches consecutiues, qu'il y mette si bõne garnison qu'il luy en puisse tousiours rendre bon compte. Dieu vueille qu'il le puisse ainsi effectuer: car la ville est de grandissime importance pour estre forte & bien munie comme vous sçauetz.

XXIII.

Pour le surplus, ledit Sieur de Tinteuille s'y comporte tres-bien. Il faißt des

courfes tout aux enuirōs, il arreste tous les courriers. Il en a fouillé & retenu quelque temps deux qui estoient enuoyez de la part de Monsieur le Duc de Lorraine vers Monsieur d'Aumalle, & Messieurs de Paris. La substāce des despēches qu'ils portoient, ie ne la sçay pas, mais elle est assez aisee à presumer.

XXIIII.

Quād M. de Tinteuille se sera acquis plus de creance & d'intelligence dans Chaalons, il promet au Roy qu'il fera des courfes iusques en Lorraine, ce qui resiouit tellement le Roy, que cela cōtrepoise vne partie des fascheries qu'il recoit d'infinis autres endroits, lesquelles encor qu'elles soiēt grādes & inestimables, si est-ce qu'il les dissimule le pl' qu'il peut, mais ce n'est si dextremēt qu'on ne remarque aisement en son visage assez de martel & d'inquietude, & possible beaucoup d'estonnement, &

de peur qu'il a, de se veoir si mal traitté
 entant de villes de son Royaume, &
 crains, pour le recognoistre ingenuë-
 mēt, qu'il se courbera, & possible qu'en
 fin il succombera sous le fais de tant
 d'affaires & de tristesses qu'iceux trai-
 nent infailliblement apres soy.

XXV.

Et vous diray neantmoins qu'a voir
 noz actiōs & deportemēs, l'on ne nous
 iugeroit pas seulement affairez, ou biē
 l'on nous estimeroit quāt & quant pu-
 rement insensibles: car nous ne nous es-
 mouuons quasi non plus, que si le Roy
 estoit encor paisiblement iouissant de
 son Roiaume, & que ses ennemis & sub-
 iects ne se fussent aucunement rebellez
 contre lui.

XXVI.

Quand on dit au Roy que les Parisi-
 ens sōt tres-resolus à ceste guerre, Que
 ils y veulēt exposer tout leurs moyens,
 & le sāt d'eux & de leurs enfans, Qu'ils

font bien à craindre, si ce n'est pour leur valeur, à tout le moins tant par ce qu'ils tiennent le principal nerf de la guerre par deuers eux, qui est l'argent, qu'aussi de Paris deppend la resolutiō generale de toute la France: Il se mocque de tout cela, & dit qu'il cognoist les Parisiens mieux qu'un homme de s^{on} Roiaume, Qu'il fasse uite, puis que leur Roy Guisard est mort, que par consequent leur courage est amorty: & qu'en tous cas qu'ils n'ont qu'une boutade sur leur pauc. Et pour l'esgard de l'argēt, Qu'ils s^{oyent} trop mal-aisez au desgel, Que tel qui fait parade de dōner mil escuz, ne dōnera pas mil sols quand se viendra au fait & au prēdre. Bref que sur son honneur, il respond que deuāt qui les ait laissē en trespē deux ou trois mois, qu'ils serōt contraints de venir à lui & lui crier misericorde: & lors qu'il en sçaura bien tirer sa raison par vne punition si cruelle &

exemplaire qu'ils seruiront de frayeur
à tous leurs adherents & confederez.

XXVII.

Quand on lui parle de *M. du Maine*,
il dit qu'il sera biē empesché de se main-
tenir en son gouuernement, & qu'il se
gardera biē de leuer la teste plus hault,
Mais ie croy qu'il n'en dit pas tout ce
qu'il en pense.

XXVIII.

Que pleust à Dieu que nous fussions à
recommencer nos ieux: Las nous pen-
sions qu'ils se conuertiroient en ioyeu-
ses Comedies, mais ie crains que la fin
les nous fera appeller Tragedies bien
sanglantes.

Quant à moy ie n'en eus oncques
bonne esperance, & encores maintenāt
moins que iamais: Car ie ne veoy point
de moyen par lequel le Roy puisse re-
conquerir en toute sa vie, seulement
le dixsme de ce qu'il a perdu en yn
moment de temps.

Que si aucuns de ses predecesseurs
 avec grandes finances, bonne quantité
 d'hommes, & l'assurance du cœur d'i-
 ceux (qui est vn rempart inexpugnable)
 ont esté bien employez & empeschez
 au recouurement d'une seule villette
 estrangee de leur obeissance, Quelle es-
 perance peut-il aujourd'huy auoir de
 recouurer vne centaine de villes fortes
 & aguerries qui se sont declarees cōtre
 luy? Car (& ie le confesse à grand regret)
 il n'a ny fonds ny argent, ny esperance
 d'en auoir. Il n'auoit pas trois cens hô-
 mes aupres de lui quand les huit cens
 harquebusiers luy arriuerēt que Mon-
 sieur d'Espernon luy enuoya. Il n'a in-
 telligence quelconque en son Roiau-
 me: au contraire vous voyez que tous
 ses subiets & routes ses villes s'vnissent
 pour se bander contre lui. De credence
 ie croy qu'il en aura d'oresnauant fort
 peu parmi les estrangers: encor qu'il
 nous

nous en promette grand secours. Mais pour moy, ie vous assure que ce secours là est aussi loing de mon esperance, qu'il est proche de mon desir. premierement l'Italien ny viendra pas, l'Espagnol encor moins, l'Allemand se souuiendra du traictement qu'il y a receu, des promesses inaccomplies qu'on lui a faictes, des payemens qu'on luy doit. Et sans tout cela: encor ne marchera-il qu'en vertu, de ce dont nous auons faute, ou plustost penurie tres-extreme.

Ce sont les raisons & particularitez qui me font quasi desesperer, que le Roy se puisse iamais sortir du Labyrinthe ou il s'est precipité & nous apres luy.

XXIX.

Mais ie crains de vous ennuyer de ce discours, auquel certes ie me suis d'auantage engaigé que ie n'auois enuie du commencement. Ie vous diray toutes-

fois encor vn mot des Estatz lesquels
 sont concluz & arrestez : Car des Lun-
 dy dernier xvi. de ce mois, Monsieur
 l'Archeuesque de Bourges & Monsieur
 de Brissac feirent leurs Harangues tant
 pour le Clergé que pour la Noblesse. Je
 ne sçay pas le nom de celui qui fut esleu
 & subrogé au lieu du Preuost des Mar-
 chans de Paris pour le tiers Estat. Quât
 aux deputez ils sont maintenant quasi
 tous partis de ceste ville: vray est qu'en
 la conclusion desdits Estats: il n'y en
 auoit pas la moitié de tous ceux qui y
 estoient au parauant la mort de Mon-
 sieur de Guise : Car elle apporta vn tel
 estonnement, que de cent & dix depu-
 tez qui estoient icy pour la Noblesse
 deuant Noel, après la feste il ne s'y en
 trouua plus que trentedeux : lesquels
 encor pour la pluspart n'auoient peu es-
 chapper. Voila ce qui se peut dire pour
 le present de nos affaires. Je vous supplie

encor vne autre fois bien humblement
d'vser de reciproque enuers moy & ex-
cuser la liberté de mon fil. A laquelle
ie me suis laissé aller vn peu plus hardi-
ment, pour l'assurance que nous a-
uons par deça que les parisiens ne font
aucune difficulté ny refus de l'entree
de leur ville: & qu'ils se rendent seule-
ment difficiles pour la sortie (Ie trouue
toutes fois ceste pratique fort nouuelle
pour se bien asseurer d'une ville) Aussi
que ie me faiets biē fort que le porteur
de la presente est tāt aduisé, qui se pren-
dra biē garde d'eux: Car sās cela i'eusse
esté possible aussi retenu à tout ce que
ie vous ay recité que i'y ay esté libre &
facile.

XXX.

Ainsi que i'acheuoishier ce propos,
& que ie voulois fermer la presente, les
nouuelles arriuerent en ceste ville que
les Parisiens (à l'imitation de ceux de

Dijon) auoient constituez prisonniers en la Bastille tous les Presidents & Cōseillers de la Cour de Parlemēt (fort peu exceptez) Aucuns & plus probablemēt dient qu'il n'y a eü d'emprisonnez que ceux qui leur estoient suspects. Mais soit l'un ou l'autre vray, il me semble qu'ils n'ont pas seulement imité ceux de Dijon: mais qu'ils ont largement commenté sur leurs œuures. Or on dit que les raisons desdites captures sōt en premier lieu, par ce que la Cour de Parlement n'auoit voulu faire ny parfaire le proces à Dubelloy, s'excusant qu'elle auoit les mains liees: A quoy, dit-on, les Parisiens respondirent qu'elle les auoit dōques eü trop libres & legeres a condamner le Breton. L'autre raison par ce que les emprisonnez auoient esté trop lents, voire & retifs à s'vnir avec eux, & à authoriser les leuces d'hommes & de deniers qu'ils font. Ou pos-

sible à cause de leurs vies & deportemens precedens. Aucuns disent encor, pour n'auoir voulu verifïer la declaration de la Sorbonne.

XXXI.

Quoy que s'en soit le Roy fust fort estonné, receuât la nouuelle, disant que cela se tourneroit en consequēce pour ses autres villes, & qu'il s'esbaïssoit que ses Officiers de Paris ayent esté si peu forts & entenduz. Puis ayant quelque peu ruminé cela, il se tourna vers Monsieur Do, & luy dist ces mots, quasi en le menassant, *Ce sont voz jeux Do, vous voyez maintenant que vous me perdēz.*

XXXII.

Auiourd'huy le Roy a esté toute la matinee au conseil sur ce fait là: & tiens de bōne part qu'il en est si effrayé, avec le peu d'asseurance qu'il auoir desia, qu'il a mis en deliberation s'il deuroit eslargir les prisonniers qu'il tient: tant pour

la deliurance de tous ses Officiers, que pour arrester le cours des choses qui se brassent contre luy & son Estat.

Je vous supplie satisfaisant à ma priere, par mesme moyen me mander la verité de ce dernier chef par plus prompte voye, s'il vous plaist, que de ce porteur: car il seiournera quelque temps à Paris, où il est enuoyé pour apprédre la langue, & s'il peut quelque credence. Icy donques, Apres vous auoir bien humblement baisé les mains, Je priray le Seigneur vous prodiguer,

Monsieur ses saintes graces & me tenir aux vostres. De Bloys ce dix-neufiesme Ianuier. 1589.

*Vostre seruiteur & tres-assuré
amy D. G.*

